



Inatsisartunut ilaasortaq Karl Lyberth, Siumut  
/MAANI

**Kalaallit Nunaanni aalisarnermi piginnittuunermut pissutsit pillugit apeqqutinut akissutit Nr. 2010-224**

2. november 2010  
Sagsnr. 2010-040419  
Dok. Nr. 489011

Suleriaasissani § 36, imm. 1 malillugu Kalaallit Nunaanni aalisarnermi piginnittuunermut pissutsit pillugit apeqquteqarputit.

Postboks 269  
3900 Nuuk  
Tlf. (+299) 34 50 00  
Fax (+299) 32 47 04  
E-mail: apnn@nanoq.gl  
www.nanoq.gl

**Apeqqutigineqartut:**

1. Kilisaatini nunatsinni angerlarsimaffeqartuni piginnittuussagaanni, piginneqataassagaanniluunniit suut piumasaqaatit naammassineqarnikuussappat?
2. Kilisaatini nunatsinni angerlarsimaffeqartuni pisassiissutinik pissarsinissamut suut piumasaqaataappat?
3. Polar Seafoodimi kikkut piginnittuunersut Naalakkersuisunit ilisimaneqarpa? Ilisimaneqarpallu kikkut piginnittuuppat, qanorlu annertutigisumik immikkoortitaarlutik piginneqataappat?

**Akissutit:**

**1-imut)**

Kalaallit Nunaata aalisarnermut oqartussaaffigisaani inuussutissarsiuqatigalugu aalisarsinnaaneq aalisarnermut pillugu Inatsisartut inatsisaat nr. 18, 31. oktober 1996-imeersumi § 6-ikkut malittarisassaqaartitaavoq. Piumasaqaatit suut naammassineqarsimanissaannut angallatip kikkunnit pigineqarnera apeqqutaavoq, takuuk § 6 imm. 2:

1. Inummit ataatsimit inunnilluunniit ataasiakkaanit ataatsimoortunit, namminneq ataasiakkaarlutik aningaasatigut ajutoortoqassagaluarpat nammaqatigiillutik toqqaannartumillu akisussaasunit, angallat pigineqarpat inuup inuilluunniit ataasiakkaat § 6, imm. 3-mi piumasaqaatit naammassisimassavaat.
2. Angallat ingerlatseqatigiiffimmit pigineqarpat, § 6, imm. 4-mi piumasaqaatit naammassineqarsimassapput.
3. Angallat ingerlatseqatigiiffimmit pisortanit pigineqartumit ingerlatseqatigiiffimilluunniit Namminersorlutik Oqartussanit piginneqataaffigineqartumit pigineqarpat piginnittuunermut atatillugu annertunerusunik piumasaqaateqartoqanngilaq.

Inuit ataasiakkaat:

§ 6 imm. 3 malillugu inuit ataasiakkaat piumasaqaatit makku naammassisimassavaat Kalaallit Nunaanni aalisarnermik ingerlatsisinnaassagunik:

- 1) Kalaallit Nunaannut aalajangersimasumik attuumassuteqassapput;
- 2) Kalaallit Nunaanni najugaqartutut inuit nalunaarsorsimaffianni nalunaarsorsimassapput, piffissami qinnuteqarfiusumi qaammatisiutillu ukiuini

kingullerni marlunni nalunaarsorsimasimassallutik;

3) Kalaallit Nunaannut tamakkiisumik akileraartartussaataaassapput, qaammatisiutillu ukiuini kingullerni marlunni taamaassimassallutik.

4) Inuussutissarsiutigalugu aalisartuussapput taamatullu inuussutissarsiornermi imaluunniit inuussutissarsiummit aalisarnermut sanilliunneqarsinnaasumit ilanngaasigaanngitsunik isertitamik tamarmiusut minnerpaamik 50 %-ii pissarsiarisimassallugit.

#### Ingerlatseqatigiiffiit:

§ 6 imm. 4 malillugu ingerlatseqatigiiffiup Kalaallit Nunaanni aalisarnermik ingerlataqassaguni piumasaqaatit makku naammassisimassavai:

1. aktiaateqarluni ingerlatseqatigiiffiussaaq, piginneqataassuteqarluni ingerlatseqatigiiffiussaaq, piginneqatigiilluni ingerlatseqatigiiffiussaaq imaluunniit peqatigiilluni umiarsuaatileqatigiiffiussalluni;
2. ingerlatseqatigiiffiup aningaasaatai minnerpaamik pingajorarterutai marluk, raajarniarnermi: ingerlatseqatigiiffiup aningaasaatai tamarmik, toqqaannartumik toqqaannanngitsumilluunniit inunnit ataasiakkaanit § 6 imm. 3 nr. 1-3-mi piumasaqaatinik naammassinnissimasunit pigineqassapput. Taamaalilluni inuit Kalaallit Nunaannut aalajangersimasumik attuumassuteqassapput, Kalaallit Nunaanni inuit nalunaarsorsimaffianni najugaqarfilitut nalunaarsorsimassallutik Kalaallit Nunaannilu akileraartartussaataaassallutik aamma
3. ingerlatseqatigiiffiup aningaasaataasa affaat sinnerlugit inunnit § 6 imm. 3 nr. 1.-4-mi piumasaqaatinik tamanik naammassinnittunit toqqaannartumik toqqaannanngitsumilluunniit pigineqassapput. Taamaamat inuit Kalaallit Nunaannut aalajangersimasumik attuumassuteqassapput, Kalaallit Nunaanni inuit nalunaarsorsimaffianni najugaqarfilitut allassimassallutik, Kalaallit Nunaanni akileraartartussaataaassallutik kiisalu minnerpaamik isertitamik tamarmiusut 50 %-ii aalisarnermit pissarsiarisimassallugit.

Tamakku kinguneraat aalisarnermik ingerlatseqatigiiffiit Kalaallit Nunaanniittut annerpaamik 1/3-imik nunanit allanit aningaasaliivigineqarsinnaasut (tamanna ingerlatseqatigiiffinnut raajarniarnermik ingerlataqartunut atuutinnigilaq) kiisalu piginneqatigiissutit minnerpaamik affaat inunnit aalisarnermit isertitaqartarnissamik piumasaqaatinik naammassinnittunik pigineqassallutik.

#### **2-mut)**

Aalisarnermik pillugu inatsimmi § 6-imi allassimasutut piumasaqaatinik, takuuk apeqqut 1-imut akissut, naammassinnissimagunik kilisaatit Kalaallit Nunaanni angerlarsimaffillit aalisarsinnaanermut akuersissummik pisinnaapput.

#### **3-mut)**

Ingerlatseqatigiiffik namminersortuummat inassutigissuara illit nammineerlutit Erhvervs- og Selskabsstyrelsen, [www.cvr.dk](http://www.cvr.dk), piginnittut pillugit paasiniaavigissagit imaluunniit ingerlatseqatigiiffik saaffigissagit kikkut piginnittuunersut apeqqutigalugu. Taamaattorli Naalakkersuisoqarfimmiit ilisimatitsissutigineqassaaq piginnittussaannermut piumasaqaatit inatsisit malillugit naammassineqarsimammata.

Inussiarnersumik inuulluaqqusillunga

Ane Hansen